

A Tx'an Libro

NEHEMÍAS

Max txajli Nehemías yuj is conob

1 ¹A jun ti' is yabixal Nehemías c'ajol Hacalías. Junc'alxa abil yoc Artajerjes yin reyal, yet xajaw Quisleu, ayin Nehemías in ti', a tu' ayin bay Susa capital yet Persia, ²a yet max apni oc jun wuǵtak chi yik Hanani yetok juntzanxa eb max tit bay Judá. Cax max in k'anlen bay eb tzetbil yayji Jerusalén yetokc'al eb betnak ec' preso bay Babilonia. ³Max yalon eb ayin: A eb jet conob tu' ayic' eb bay Judá caw wal yob yayji ec' eb, ayoc eb yin q'uixwilal. A Jerusalén xin, uchchajnaktok is murallail cax tz'anaktok is puertail, ǵi eb.

⁴A wal yet max waben axca tu' cax max in ay chotan ok'ok. Ay wal jayeb c'ual cusc'ulal c'al wayji. Max in oc yin c'ajbanc'ulal, cax max in txajli bay cham Diosal satcan. ⁵Max waloni: Mamin Jehová Diosal satcan, tol miman yayji a mayk'ak'al, chic'al yun a trato yetok eb chach ocheni c'al eb chi iken a chekbanil. ⁶Chin k'an ayach tol cha cha ab in txaj chi wak' ayach yet junjun c'u c'al junjun ak'bal, juj ayon a conob Israel on ti' tol a chekbej jayji. Chi wal co mul on ayach. Ayin ti' yetokc'al eb wichmam, max oc co mul on ayach. ⁷Caw wal yelxac'al yob max jut co ba a satak. Majc'al jikej a chekbanil c'al a ley, c'al tzet max alcan ayon yuj a chekbej Moisés, ⁸xan natek tzet max al bay a chekbej tu': Ta man ok e yikej tzet max wala', ok ex in saklemnejtok bay masanil yulyibank'inal. ⁹Palta tatol ok ex meltzoy pax junelxa ayin, cax ok e yiken in chekbanil, caxc'al mi baytal ayexcantok bay lajubal yulyibank'inal ti', ok ex in wajban paxtek junelxa bay jun lugar tol sic'bil el wuj, bay chi oc ayilal ayin, cachi bay a chekbej Moisés.

¹⁰Ayon ti' a chekbej on, ayon a conob on, max on a colil yuj epalil. ¹¹Chin k'an ayach Mamin, tol cha cha ab in txaj ayin a chekbej in ti' c'al yetok is tewilal juntzanxa a chekbej tol chi jochej chach jiaj can. Cax chin k'anon pax ayach tol chak' ayin yet chi je' wuj yet chi oc t'anan cham rey yin tzet ok wal bay, quin chi.

Ayin oc yin batxomalok is vino cham rey Artajerjes.

Max cha c'ul rey Artajerjes max toj Nehemías bay Jerusalén

2 ¹A yet jun c'ual yul xajaw Nisán, yinxá junc'al abil yoc Artajerjes yin reyal, a yet lanan wak'on is vino cham rey tu' cax max yiloni tol cusiltak in c'ul. Palta c'am junelok caytu' wili axca tu', ²yuj tu xin xan max k'anlej ayin:

—Chi cus a c'ul chi wila'. ¿Tzet chab yail? Tokwal ay ilya' chach oni. ¿Ay mi wal tzet ayoc yin a c'ul? Xi cham rey tu'.

A wal yet jun bek tu' max oc jun miman xiwc'ulal win. ³Cax max walon bay cham axca ti':

—¡Ayokab achc'al ec' mamin rey! ¿Tzet wal yuj xan man ok cus in c'ul, yujtol a conob bay mukan eb wichmam etaxnaktok, c'al is puertail tz'anaktok? quin chi.

⁴—¿Tzet watx' chi yun in colwaj ayach xin? Xi cham rey tu'.

Xan max wabenen oc in ba bay cham Diosal satcan, ⁵cax max in tak'wi bay cham rey axca ti':

—Ta chi cha a c'ul, ta watx' in yul a sat, chin k'an ayach tol chin atok bay Judá tu' bay conob bay mukan eb wichmam, cax chin ca watx'nen canok, quin chi.

⁶Chotan ay cham rey, chotan c'apax ay xal reina bay is tz'eyil.

—¿Jantak wal tiempoal chach toji? cax ¿bak'in wal chach jay paxok? Xi cham ayin.

Lajwi walon jantak tiempo, max chaon c'ul cham tzet max in k'ana'.

⁷Max walon c'apax bay cham rey: Ta chi je' wal chabej, ak' junok orden ayin yin unal yet chi toj bay eb cham gobernador bay yetc'ulal yayubc'ual a' miman aej Éufrates, yet watx' chin chalay ec'tok yuj eb masantac'al chin apni oc bay Judá. ⁸Cax chi toj junokxa orden tu' bay cham Asaf is yilomal a te' bay tu', cax chi yak'on te' ayin yet chi oc te' puertailok is nail bay ay eb chi taynen templo, c'al puertailok is murallail conob, c'al yoc te' yin na bay ok in cajayok, quin chi. Max yak'on cham rey masanil juntzan ti' ayin yuj is watx'c'ulal Jehová max colwaj wetok.

⁹Max chektok cham rey juntzan soldado ayoc yiban chej wetok yetokc'al jajawil eb. A yet max in apni oc bay eb ayoc yin jajawilal bay yetc'ulal yayubc'ual a' miman Éufrates, cax max wak'on tx'an carta max yatek cham rey ayin. ¹⁰Palta a yet max yaben Sanbalat aj Horón, c'al Tobías jajaw yayji aj Amón, max tit yowal eb yujtol chin apni oc colwaj yetok eb wet israelal.

Ec'nak Nehemías yilon muralla

¹¹Max in apni oc bay Jerusalén xin. Yet-xa is yox c'ual ¹²max quin aj wan yet ak'balil yetok jaywan eb nak winak ajun wetok, palta c'am junok bay max wala' tzet max yaoc Dios yin in nabal yin tzet ok wun bay Jerusalén. Majxa jitok juntzanokxa no chej, palta asan no wikomal.

¹³A yet jun ak'bal tu' cax max in eltek bay puertail jobe, max in ec'tok

bay yetc'ulal is nuk' a' Dragón, max in ec' c'apaxtok bay puertail bay chi betcan k'alem. A bay tu' max ec' in beytzej is murallail Jerusalén, toxac'al wekan ayok, c'al is puertail tz'anakxatok. ¹⁴Cax max in beytzenc'al puerta ay cawilal nuk' a' aej c'al yetok is pila cham rey. A bay tu' majxa je' yec'tok in chej. ¹⁵Ak'baliltoc'al cax max in ajtok bay tilak a' Cedrón, max lajwic'al in beytzen muralla tu', axa in meltzoz pax octok bay is puertail jobe.

¹⁶A eb yajaw man yojtakok eb baytal ayin tok, tamwal yojtak eb tzet chi wunej. C'amtoc'al tzet max wal c'apax bay eb wet israelal, tamwal bay eb sacerdote, tamwal bay eb yajaw yayji, tamwal bay eb t'inan mulnaji. ¹⁷Lajwi tu' max waloni:

—Ayex ti' e yojtak tol yobxac'al yayji oc co conob Jerusalén ti', aynakxa weknajok, cax tz'anakxatok is puertail. Xan wajbajek oc e ba wetok cax chi co ca watx'nenek aj is murallail Jerusalén ti', yet watx' c'amxa chon tzeyelayi, quin chi.

¹⁸A yet max walon bay eb jantak is watx'c'ulal Dios max yak' ayin, c'al yuj tzet max yal cham rey ayin, max yalon eb:

—Co chaek oc co watx'nen xin, xi eb. Axca tu' max yiptzelen ba eb yin jun mulnajil ti'. ¹⁹A yet max yaben Sanbalat aj Horón c'al Tobías yajaw yayji aj Amón, c'al yetok Gesem, nak árabe, max buchwaj eb jin, max yalon eb ayon:

—¿Tzet che yun e yaloni? ¿Ma tol che yochej che yak' yobc'ulalil yin cham rey? xi eb.

²⁰Cax max in tak'wi:

—Yuj Cham Diosal satcan xan ok je' juj. Ayon is chekbej on ti' ok co chaoc co watx'neni, a pax ayex ti' xin, c'am e yalon e yet yin, tamwal e yikbej, tamwal e nalaytek yin Jerusalén ti', quin chi bay eb.

Max pojlay ec' mulnajil

3 ¹A cham sat sacerdote Eliasib c'al eb yet sacerdoteal ajun yetok, a eb tu' max ca watx'nen aj bay ok oc puertail yet no calnel. Max yaon oc eb yul k'ab Dios axa yaon oc eb puertail. Max ca watx'nen aj eb muralla, max tojtac'al bay torre chi yik Hamea masantac'al bay torre chi yik Hananeel. Lajwi tu' max yaoncan oc eb yul k'ab Dios. ²Axa junxa makan muralla chi beyc'al toji max ca watx'nej aj eb winak aj Jericó. Junxa makan max ca watx'nen eb yet Zacur, a ton is c'ajol Imri. ³Axa eb yinatil Senaa max ca watx'nen aj bay ok oc puertail yet no txay. Max yaoc eb jolom puerta max yaon oc eb is puertail c'al yetok ch'en hierro ayoc is mitx'banilok. ⁴Axa junxa makan muralla chi beyc'altoji, a Meremot, c'ajol Urías yitxiquin Cos max ca watx'neni. Axa junxa makan, a Mesulam c'ajol Berequías, yitxiquin Mesezabeel max ca watx'neni. Junxa makan, a Sadoc c'ajol Baana max ca watx'neni. ⁵Axa junxa makan max ca watx'nej eb aj Tecoa, palta a eb mimek winak yayji xol eb, maj yal c'ul eb max colwaj yetok eb chi ikban mulnajil tu'. ⁶A Joiada c'ajol Paseah, c'al Mesulam c'ajol Besodías, a eb max ca

watx'nen aj bay ok oc puerta chi yik Jesana. Max yaon oc eb is jolom puerta, c'al yetok is puertail, c'al yetok ch'en hierro ayoc is mitx'banilok. ⁷Junxa makan muralla chi beyc'altoji max ca watx'nej aj Melatías aj Gabaón c'al yetok Jadón aj Meronot, yetokc'al eb anima aj Gabaón c'al yetok eb aj Mizpa. Ayoc eb yalan yikbej cham gobernador bay yetc'ulal yayubc'ual a' Éufrates. ⁸Axa junxa makan max ca watx'nej aj Uziel, c'ajol Harhaía, jun watx'nem ch'en watx' yili. Axa junxa makan max ca watx'nej Ananías jun watx'nem perfume. A eb cawan tu' max ca watx'nen aj muralla Jerusalén masantac'al bay muralla caw wal miman sat. ⁹Junxa makan max ca watx'nej aj Refaías, c'ajol Hur; a ton jun tu' ayoc alcalil yin nanok lugar ay yul makbej conob Jerusalén. ¹⁰Junxa makan max ca watx'nej aj Jedaías, c'ajol Harumaf, yujtol a satak is na ay, axa junxa makan max ca watx'nej aj Hatús c'ajol Hasabnías.

¹¹A Malquías c'ajol Harim, c'al Hasub, c'ajol Pahat-moab, a eb tu' max ca watx'nen aj junxa makan yetok jun torre chi yik Hornos. ¹²Axa junxa makan max ca watx'nej aj Salum, c'ajol Halohes. A jun tu' alcal yayji oc bay nanxa lugar ayoc yul makbej conob Jerusalén. Max colwaj c'apax eb is cutz'in yetok. ¹³A Hanún yetok eb cajyom bay Zanoa max ca watx'nen aj bay ok oc puerta bay jobe. Max yaon oc eb puertail, axa yaon oc eb ch'en hierro is mitx'banilok. Max ca watx'nen c'apax aj eb 450 metro muralla, masantac'al bay puertail bay chi bet can k'alem. ¹⁴Axa Malquías c'ajol Recab, yajaw yayji bay yul makbej conob Bet-haquerem, a jun tu' max ca watx'nen aj bay ok oc puertail bay chi bet can k'alem max yaon oc is puertail tu' yetokc'al ch'en hierro ayoc yin is mitx'banilok.

¹⁵A Salum c'ajol Colhoze, yajaw yayji bay yul makbej conob Mizpa, a jun tu' max ca watx'nen aj bay ok oc puerta bay nuk' aej. Max yaoc is patil max yaon oc is puertail tu' c'al ch'en hierro max yaoc yin is mitx'banilok. Max ca watx'nen c'apax aj muralla bay a' najab Siloé bay cawilal yawben te' eb rey, masantac'al bay chi aytok k'och beal conob David. ¹⁶A Nehemías c'ajol Azbuc, gobernador yayji yin nanok yul makbej conob Bet-sur, a max ca watx'nen aj junxa makan muralla max tojtac'al bay satak is mukbanil David masantac'al max apni bay wajan a' aej, max apni oc bay ay is cuartel eb soldado.

¹⁷Axa eb levita ikbabil yuj Rehum, c'ajol Bani max ca watx'nen aj junxa makan muralla chi beyc'altoji. Axa bay sataktok, a Hasabías yajaw yayji bay nanok yul makbej conob Keila. A jun tu' max ca watx'nen aj junokxa makan q'uexelok eb yet conob. ¹⁸Axa junxa makan chi bey toji max ca watx'nej aj eb yetbi ba yetok eb tu'. A Bavai c'ajol Henadad, a' max ikban eb. A jun tu', yajaw yayji bay nanxa yul makbej conob Keila tu'. ¹⁹Axa Ezer c'ajol Josué, yajaw yayji bay Mizpa, a jun tu' max ca watx'nen aj janic'xa bay satak bay wajan arma, masantac'al bay esquina. ²⁰Max beyc'altok, axa Baruc, c'ajol Zabai, yin masanil c'ul max ca watx'nen aj junxa makan muralla max toj bay esquina masantac'al max apni oc bay puertail yatut Eliasib, a ton cham sat sacerdote. ²¹C'al Meremot c'ajol Urías, yitxiquin

Cos, a max ca watx'nen aj junxa makan max beyc'altok, max toj bay puertail yatut cham Eliasib masantac'al bay chi apni oc yatut cham.

²²Axa junxa makan muralla max beyc'altok, max ca watx'nej aj eb sacerdote cajan bay jobeal yet a' Jordán. ²³Max beyc'altok satak yet eb tu', axa Benjamín c'al Hasub, a eb max ca watx'nen muralla bay satak is na. Max lajwi yet eb tu', axa Azarías c'ajol Maasías, yitxiquin Ananías, a max ca watx'nen c'apax aj bay satak yatut. ²⁴Axa junxa makan max ca watx'nej aj Binuy, c'ajol Henadad, max toj bay yatut Azarías masantac'al max apni oc bay esquina. ²⁵Chi beyc'altok, axa Palal c'ajol Usai, max ca watx'nen aj bay esquina masantac'al cawilal jun torre can ayajok bay is despacho cham rey, a ton bay yiban yamak'il yatut eb soldado chi taynen bay tu'. Axa junxa makan max ca watx'nej aj Pedafías, c'ajol Faros, ²⁶masantac'al bay satak puertail bay chi eltok eb ix ix ioj aej, chi tojcan bay yetc'ulal yichcan, cawilal jun torre yelxac'al can ayajok. A eb chi ak'wic'alta' serbil bay templo, eb cajan bay Ofel, max ca watx'nen aj junok makan. ²⁷Axa eb aj Tecoa max ca watx'nen junxa makan muralla, max tojtac'al bay satak jun torre can ayaj tu' masantac'al bay muralla bay Ofel.

²⁸Axa eb sacerdote xin, max ca watx'nej aj eb muralla bay satak is yatut junjun, max tojtac'al bay puertail bay chi oc no chej. ²⁹Max beyc'altok satak yet eb tu', axa Sadoc c'ajol Imer, a' max ca watx'nen aj muralla bay satak is yatut. Junxa makan max beyc'altok axa Semaías max ca watx'nen ajok, a ton c'ajol Secanías. A jun tu' max taynenc'alta' puerta bay yetc'ulal yichcan. ³⁰Max ca watx'nen aj Hananías c'ajol Selemías, c'al Hanún, a ton yet is wak unin Salaf, junxa makan yet. Axa yet max lajwi yet eb tu', axa Mesulam c'ajol Berequías max ca watx'nen aj jun makan bay satak is yatut. ³¹Axa Malquías watx'nem ch'en watx' yili, max ca watx'nen aj muralla masantac'al bay yatut eb chi ak'wi serbil bay templo, c'al bay yet eb txonjom, satak puertail bay ayoc eb taynewom masantac'al bay chi ayji eb chi taynen bay esquina tu'. ³²Axa eb watx'nem plata c'al yetok eb txonjom, max ca watx'nen aj muralla max tojtac'al bay ayic' eb chi taynen bay esquina tu', masantac'al max apni oc bay ay puertail yet no calnel.

Is buchwal eb ajc'ul

4 ¹A yet max yaben Sanbalat tol mayal co chaoc co ca watx'nen aj muralla, caw wal max tit yowal c'ul, cax max chaon oc buchwaj yetok yowal c'ul jin. ²Max oc ijan yalon buchwal k'anej jin satak eb ajun yetok, c'al eb soldado aj Samaria. Max yal axca ti': Mimekxac'al chi yut ba juntzan israel ak'om wajil ti'. ¿Ok mi ca watx'nej aj eb jun muralla ti' yaloni? ¿Chi mi na eb tol yuj xajanbal eb tu' junnej c'u ok yun watx'jok jun mulnajil tu'? ¿Chi mi laj na eb tol a xol juntzan icham tz'ayil ch'en bulan ay ti', ok yieltek eb ac' ch'en yaloni? xi eb.

³Ay c'apax oc Tobías amonita xol eb. A' chi aloni: A juntzan ch'en chi watx'nej aj eb yin muralla tu', elawtakxac'al chi yut eb. Ta chi ajtok junok no wax bay yiban tu' chi tzakay no' tenon ay bulnajok, xi.

Txaj cham Nehemías

⁴Axca ti' max yun in txajli: Mamin, ach co Diosal, abtonab tzet wal chi yun buchwaj eb jinon. Tokabcan is yobc'ulal eb tu' yiban, axa eb yajc'ul eb, yiokabtok eb masanil is tzet yetal eb cax chi tojcan eb mosejal bay junokxa nación. ⁵C'amokab chak' mimanc'ulal yin is mul eb ti', cax c'amokab chi toj c'ayc'ulal oj tzet max yun eb, yujtol caw wal yob tzet max yal eb jin, mac on chi co watx'nej aj muralla ti', quin chi.

Max ec'xac'al eb ajc'ul yiban

⁶Max on occ'al ijan co mulnaj yin muralla, ayman max nanji juj yujtol caw wal ay is tzalojc'ulal eb conob mulnaji. ⁷Axa pax Sanbalat, yetok Tobías, eb árabe, eb amonita, c'al yetok eb aj Asdod max yaben eb tol ayc'al oc mulnajil juj yuj co ca watx'nen aj muralla, c'al mayal makay bay mimek max yun jakchaji, yuj tu' caw wal max tit yowal eb. ⁸Masanil eb max k'umelej el ba tol chi oc eb jin, cax chi yuchon ay eb Jerusalén junelxa yaloni. ⁹Caytu' max yun jak'on co txaj bay co Diosal, cax max jaon oc co taynemal junjun c'u c'al junjun ak'bal yuj eb ajc'ul tu'. ¹⁰Max yalon c'apax eb chi mulnaji: Mayal c'unbi aj eb nak ikom ch'en, xiwilxa pojilal jun icham muralla ti', maj techaj juj co watx'nen ajok, xi eb.

¹¹A mi naon eb ajc'ul oc jin tu', tol c'am chi nachaj el juj, ma c'am chi jila', cax ok oc eb co xol yet chon is mak'cam eb cax chi oc waan mulnajil ti', yalon eb. ¹²A eb jet conob cajan bay cawilal eb tu', chi ulc'al yal eb tol a juntzan anima tu' t'inan ok oc eb jin yaloni, tzanc'al bay chon mulnaji. ¹³Yuj wal tu' xan max wala' tol yin junjun makan yicanc'al ba, chi taynej bay yul muralla bay jobelak tx'otx' c'al bay jakanto, cax chi yion eb is yespada, is lanza, c'al is julbal. ¹⁴A yet max wiloni tol chi xiw eb, cax max in tec'ban in ba walon bay eb yicham winakil conob c'al eb ayoc yin yajawilal xol conob tu', c'al bay masanil anima: C'am chex xiw bay eb tu', naektek tol caw wal ay is may yayji oc co Diosal, xan co colek eb jetbi, c'al juninal, c'al eb jet conob, c'al jatut, quin chi bay eb.

¹⁵Max yaben eb ajc'ul oc jin tu' tol makbil eb juj, cax max nachaj el yuj eb tol maxax yuchtok Dios masanil tzet max wajan alnej eb tu', caytu' max yun joc pax co mulnaj junjun on yin muralla. ¹⁶Atax yet jun c'ual tu', nannej eb in mulnajwom chi mulnaji, axa nanxa eb xin, watx' yayji eb yetok is mitx'k'ab yet owal, a ton is lanza, c'al is makbal julbalej, c'al is julbal yetok c'apax ch'en coraza. Axa eb yajawil conob ayoc eb yetok eb mulnajwom yin yiptzen eb, ¹⁷a ton eb anima ayoc yin watx'nej muralla. Eb iktzom max oc pax ijan eb yin ikoj tzetak yetal, cax jun junej is k'ab eb chi mulnaji, axa junxa xin, inej oc ch'en mitx'k'abej yet owal. ¹⁸Axa eb chi mulnaj yin watx'nen aj muralla tu' ayoc is yespada eb yin is nan. A bay in c'atan, a tu' ay pax ec' nak chi xuon no cacho. ¹⁹Max wal bay eb yajawil conob, c'al bay eb ikbajwom, c'al bay masanil eb anima: Caw wal miman mulnajil, yel xiwil yayji ocok, axa ayon ti', max on pojaxtok yinlak muralla, cax

tx'ok tx'okxac'al bay ayon cantok junjun on. ²⁰Yuj tu xin, a yet che yaben xulay no cacho, cax chex tit co c'atan, axa co Diosal ok ak'on owal juj, quin chi.

²¹Xan a nanok on chon mulnaji, chon oc yet chi sakbi masantac'al yet chi k'ekbi, axa nanxa xin, ibil oc is mitx'k'ab yet owal. ²²Axa yet jun tiempoal tu', max walon bay eb wet conob tu' tol chi can eb way yetok is chekbej bay yul conob Jerusalén ti' yet chi taynej eb conob ti' jetok yet ak'balil; axa yet c'ualil xin, chon mulnaji. ²³Ac'ala' c'apax ayin ti' yetok eb ayto wuj in ba yetok, c'al eb in chekbej, c'al eb chin tayneni, majc'al jiel co pichil yet ak'balil, ibilc'al aj co lanza juj.

Cawxinakil ay xol conob

5 ¹A yet jun tiempoal tu' caw wal max yal ba eb anima, eb winak c'al eb ix ix yuj tzet chi utlay eb yuj eb yet conob. ²Ay eb chi aloni tol xiwil yuninal xan yowalil chi jec eb is trigo yet c'am chi cam eb yuj wajil. ³Ay pax mac chi aloni tol chi yacantok yunal is tx'otx', ma yawoj uva, ma yatut, yin prendail yuj manon tzet chi lo' yuj wajil. ⁴Ay c'apax mac chi aloni tol yuj yak'on tojlalal bay cham rey chi k'an tumin majanej cax chi yaoncantok is tx'otx' ma yawoj yuj majanbilal ch'en. ⁵Max yalon pax eb: Axca ayon ti' yetok eb jet conob ti', junnej jinatil on, c'am mac tx'ok yili yuninal, lajanc'al yili juninal yetok yuninal eb, xan tzet wal yuj a eb juninal ayoc eb yalan is chekbanil eb, ayon ayxa co cutz'in ayoc is chekbejok eb, chi ak'on co jec tzetax yetal tu'. C'amxa tzet watx' chi jut co ba yujtol yet-xa eb co tx'otx' c'al jawoj, xi eb.

⁶A yet max waben yalon eb anima tzetbil yayji tu', caw wal max tit wowal. ⁷Max lajwi tu' max cam in naon wali, cax max in tenchanen eb mimek winak yayji, c'al eb yajawil conob yuj k'anon el eb miman yuca' is tumin bay yet conob. Yuj tu' xan max wawtej masanil eb anima yin jun k'umbalba yuj jun k'anej tu'. ⁸Cax max walon bay eb: Ayon co xol ti' tol max jak' jip co colon el jet conob txonbilocantok bay juntzan tx'ok nacional, ¿tom okto e txonc'altok eb jet conob, ayonxa ok co man pax bekchaj el junelxa? quin chi bay eb.

Cax tz'inxac'al xi eb masanil. C'amxa chi nachaj el yuj eb tzet chi yut paktzen eb. ⁹Cax max walon paxok: Caw wal man watx'ok jun tzet che yun ti'. Is moj wal tol che tx'ox tol miman yelapnok Dios yul e sat, yet c'amxa chi buchwaj eb anima ajc'ul oc jin. ¹⁰Yetok c'apax eb ayto wuj in ba yetok, c'al eb chi mulnaj wetok, max jak' majanej eb tumin, c'al trigo max jak' c'apax q'uex eb, palta ok jak' tan juntzan is jec eb tu' yiban. ¹¹Yuj tu' xan chi wal ayex tol che yak' meltzoy is tx'otx' eb wal tinani', is yawoj eb, is yolivo eb, c'al is yatut eb, cax che yak'on tan is jec eb ayex tu' yiban, cax che yak'on meltzoy is yuca' tumin, ma trigo, ma vino, ma aceite, juntzan toxa max e k'an bay eb, quin chi bay eb. ¹²Max tak'wi eb masanil: Ok jak' pax masanil bay eb. C'amxac'al tzet ok jal yuj juntzan tu'. A masanil tzet chal tu' ok jikej, xi eb.

Caytu' max yun wawten c'apax eb sacerdote; satak wal eb, cax max wak' yak' eb is ti' yuj tzet max yal eb tu'. ¹³Yetok c'apaxok max in

tzicobthanej in pichil, max waloni: Axca wal tu' ok yun tzicon eltek Dios bay e yatut c'al bay e satak, tatol man ok e yikej bay che yak' e ti' ti'. Axca c'apax tu' ok yun yion ec' Cham tzet yetal ay ayex tinani', quin chi bay eb. Masanil eb max tak'wi: Yunokab axca tu', ok jikej, xi eb. Cax max yalon eb watx' k'anej bay Jehová. Max yiken eb tzet max yal tu'.

Is watx'c'ulal Nehemías

¹⁴A yet junc'alxa abil yoc Artajerjes yin reyal bay Persia cax max quin yaon oc yin gubernadoral bay yul yet Judá, masantac'al max tz'aknaj 32 abilxa yoc Artajerjes tu' yin reyal. A yet lajcaweb abil ayin oc yin gubernadoral tu', tamwal eb ayto wuj in ba yetok, tamwal ayin c'apaxok max co cha colwal tol jettac'a yayji ocok. ¹⁵Akxa eb gubernador max ec' yet yalantok, yet c'amto chin oqui, caw wal axca ikatz yayji eb bay eb conob. Junjunc'al c'u chi k'anon el eb 40 siclo ch'en plata yuj tzet chi lo', c'al yuj is vino. Yetok c'apaxok chi etnelay eb conob yuj eb chekbej eb, palta ayin xin, maj wun axca tu' yujtol caw wal miman yelapnok Dios yul in sat. ¹⁶Yetok c'apax junxa, max wikej in watx'nen c'apax junok makan wet yin is murallail conob, yetok eb in chekbej, max mulnajc'al eb wetok. C'am junok tx'otx' max ji'. ¹⁷Ay 150 eb winak chi low wetok, a ton eb wet conob, c'al eb ayoc yin yajawilal, axa pax eb toc'al chon ul ilonok, chi tit bay juntzan nacionlak oyan oc jinlak ti', c'am oc eb tz'akilok. ¹⁸A tzet yetal tol wet yayji chi watx'ji junjun c'u: jun no buey chi cami, wake'on no icham calnel chi cami, tx'ok pax yayji no cañlan. Cax yinc'al laj lajoneb c'ual chi ilaytek xiwil vino, palta c'am bay max in k'an tzet max in lo' yin wopiso ti' tol in moj in chaoni, yujtol miman yayji oc is cawxinakil jun conob ti'. ¹⁹Xan max in txajli: Na in c'altek Mamin, yuj in watx'ilok, yuj masanil tzet max wun yin jun conob ti', quin chi.

Jun bulan eb ajc'ul yin cham Nehemías

6 ¹Axa yet max yaben aj Sanbalat, Tobías, Gesem aj Arabia, c'al yetok juntzanxa ajc'ul oc jin tol mayal watx'ji aj muralla, c'amxa bay jakan, caxc'al mi yel tol c'amto chi oc is puertail, ²max yatek Sanbalat c'al Gesem tu' jun chekbej ayin yuj yaloni tol chi co waj co ba yetok eb bay junok aldea bay ac'al yet Ono. A jun chi na eb tu' a yuj yak'on eb junok yobc'ulalil win. ³Yuj tu' xan max in chektok in chekbej yalon bay eb: C'am in colil, tol caw wal witz'an in yin jun mulnajil caw wal miman yelapnok. Yuj tu' xan c'am chi je' in toji, yujtol ta chin toji, a jun mulnajil ti' chi occan waanok, quin chitok. ⁴Canel wal max chek eb ul al-lay jun k'anej tu' ayin, palta ac'ala' max wut in paktzen bay eb.

⁵Yinx a oyel xin, a wal caw jun is chekbej Sanbalat tu', max chektek ul yak'on jun carta tol jakan, ⁶bay max yal axca ti': Chi bey k'umal xol anima, cay c'apax tu' yalon Gesem, tol ach ti' yetok eb et israelal lanan e naoni tol ok e pojil e ba yul k'ab reyal Persia, yuj tu' xan lanan e watx'nen aj muralla. Atac'ala' chi yun yel k'umal, tolach ach ok ach oc yin reyal. ⁷Mayal ab aoc eb chekbej Dios yuj yalon el eb tol rey achxa bay Jerusalén c'al bay Judá. A

jun e k'umal chi el tu' toc'alta' ok apnok oc bay cham rey Artajerjes, yuj tu' xan títan, cax chon k'anjab wal etok, xi Sanbalat yin jun carta tu'.

⁸Lajwi tu xin, max waontok paktzebal bay eb, max waloni tol a juntzan k'anej tu' caw wal man yelok, palta a juntzan tu' toc'al cha na ajok, quin chitok. ⁹A eb tu' max na eb axca tu' yuj on xibten aj eb. Chi mi na eb tol ok cabax aj co c'ul cax c'amxa chi yi ba jun co mulnajil ti'. Palta max in txajli axca ti': Mamin ak' in tec'anil, quin chi. ¹⁰Lajwi tu' max in betic' bay yatut Semaías, c'ajol Delaías, is yitxiquin Mehetabel. A jun tu' mayal makchejtok ba yul yatut. Max yalon ayin axca ti': Co c'ubaj co ba bay templo Dios, cax chi co makchen wal is puertail, yujtol a yet jun ak'bal ti' chi na eb ach ul mak'on camok, xi ayin. ¹¹Palta max in tak'wi bay axca ti': ¿Tom in moj chin c'ubaj el in ba in makchen octok in ba bay yul templo yet chin col in ba? Xan man ok in octok bay yul templo tu', quin chi bay.

¹²Max nachaj el wuj tol a jun tu' c'am chi k'anjab axca wal tzet chi yal Dios. A juntzan tu' max yal yuj yak'on yobc'ulal win, yujtol a Sanbalat c'al Tobías mayal yak' eb tumin bay. ¹³Max tojlanej eb yuj in xibtelay aj yuj, yet chi oc in mul yalon eb, yet watx' caw wal yob in binaji, cax chi el in q'uixwil. ¹⁴Xan max in txajli axca ti': Ach in Diosal, natek yuj aon oc yailal yiban Sanbalat yetok Tobías yuj tzet max yun eb. Na c'apax tek xal Noadías yalomal el a k'anej yaloni, c'al yetok juntzanxa eb chekbej chi yochej eb chin xibtej ajok, quin chi yin in txaj.

¹⁵Max lajwi watx'ji muralla yet 25 waay xajaw Elul; 52 c'ual max oc mulnajil tu'. ¹⁶A yet max yaben masanil eb ajc'ul oc jin yetokc'al masanil juntzanxa nacionlak ayic' co cawilal, caytu' max yun xiwaj eb, c'al yaytek is maynejbail eb, yujtol max nachaj el yuj eb, tol a jun mulnajil ti' max yi ba juj yuj is colwal co Diosal.

¹⁷A yet juntzan c'ual tu' xiwilxa carta max tz'ibejtok eb winak mimek yopiso aj Judá bay Tobías, max jayc'al is paktzil. ¹⁸Yujtol xiwil juntzan winak tol mimek yopiso watx' yak'on yetok Tobías, yujc'al tol niej jun tu' bay cham Secanías, c'ajol Ara, c'al Johanán is c'ajol Tobías max nupay yetok is cutz'in Mesulam, a ton is c'ajol Berequías. ¹⁹Yuj tu' xan watx'xac'al tzet chi yal eb yin jun tu' in satak, cax chi yalon eb bay Tobías tu' masanil tzet yetal chi wal ayin ti'. A pax Tobías xin, max yatek carta ayin yin in is xibten ajok.

Max yaoc cham Nehemías eb ikbajwom

7 ¹A yet max watx'ji el muralla tu xin, c'al watx'ji oc is puertail, max waon oc eb taynem puertail templo, eb chi bitni c'al yetok juntzanxa eb levita. ²Max waoc cawan eb ti' yin ikbajwomal yin conob Jerusalén, a ton wux'tak Hanani c'al Hananías tol comandante yayji bay cuartel yet Jerusalén. Asannej oc jun tu' caw wal tol miman yelapnok yul sat anima, caw wal miman c'apax yelapnok Dios yul sat. ³Max waloni tol ato yet canxa c'u, catatu' chi jakay puertail Jerusalén, axa yet yayc'ualil caw wal watx' chi yun makayi, yet c'amto chi el eb taynem puerta tu'. Max waon c'apax oc jaywan eb cajyom bay Jerusalén yin tayneni, ay mac txequelnej bay chi taynej, ay pax mac xin, chi

taynej bay cawilal is yatut. 4A jun conob ti' caw wal miman yayji ocok, palta txennej anima cajanxa ec'ok, yujtol c'amtoc'al chi ca watx'nelay aj nalak.

Listail eb max meltzotek bay Babilonia

(Esd 2.1-70)

5Axca tu xin, a Dios max ak'on wunej max in wajban oc masanil eb winak tol mimek yelapnok, eb yajaw yayji xol conob tu', yetok eb c'am ikbej ayoc yiban, yet chi tz'ibelay eb yul libro atac'ala' yichmam eb, cax max ilchaj c'apaxtek tx'an un bay tz'ibbilcan yichmam eb tol ayxatax meltzotek, a ton bay tu' tz'ibbil axca ti':

6-7A ton is listail eb yinatil eb titnak bay Judá ti': a ton eb max ilaytok yuj Nabucodonosor, reyal Babilonia. Max lajwi tiempoal ayic' eb yin presoal bay tu', max meltzotek eb bay Jerusalén c'al bay juntzanxa lugar yul yet Judá, junjunc'al max apni oc bay is conobal. Ikbabil eb yuj eb cham ti': a ton Zorobabel, Josué, Nehemías, Azarías, Raamías, Nahamani, Mardoqueo, Bilsán, Misperet, Bigvai, Nehum c'al Baana.

8A eb yinatil Paros, 2,172 eb.

9A eb yet Sefatías 372 eb.

10A eb yet Ara, 652 eb.

11Eb yet Pahat-moab, a eb tu' yinatil Josué eb, c'al yinatil Joab, 2,818 eb.

12Eb yet Elam, ay 1,254 eb.

13Eb yet Zatu, 845 eb.

14Eb yet Zacai, 760 eb.

15Eb yet Binuy, 648 eb.

16Eb yet Bebai, 628 eb.

17Eb yet Azgad, 2,322 eb.

18Eb yet Adonicam, 667 eb.

19Eb yet Bigvai, 2,067 eb.

20Eb yet Adín, 655 eb.

21Eb yet Ater, a ton eb yinatil Ezequías, 98 eb.

22Eb yet Hasum, 328 eb.

23Eb yet Bezai, 324 eb.

24Eb yet Arif, 112 eb.

25Eb aj Gabaón, 95 eb.

26Eb aj Belén c'al eb aj Netofa, 188 eb.

27Eb aj Anatot, 128 eb.

28Eb aj Bet-azmavet, 42 eb.

29Eb aj Quiriat-jearim, Cafira c'al Beerot, 743 eb.

30Eb aj Ramá c'al eb aj Geba, 621 eb.

31Eb aj Micmas, 122 eb.

32Eb aj Betel c'al eb aj Hai, 123 eb.

33Eb aj yet is cab Nebo, 52 eb.

³⁴ Eb aj yet is cab Elam, 1,254 eb.

³⁵ Eb aj Harim, 320 eb.

³⁶ Eb aj Jericó, 345 eb.

³⁷ Eb aj Lod, Hadid c'al Ono, 721 eb.

³⁸ Eb yet Senaa, 3,930 eb.

³⁹ Axa jun makan eb sacerdote yinatil Jedaías, yinatil c'apax Josué, 973 eb.

⁴⁰ Eb yinatil Imer, 1,052 eb.

⁴¹ Eb yet Pasur, 1,247 eb.

⁴² Eb yet Harim, 1,017 eb.

⁴³ Axa eb levita yinatil Josué c'al Cadmiel, a juntzan eb tu' yinatilto c'apax Hodavías, ay 74 eb.

⁴⁴ Axa eb yinatil Asaf, eb chi bitni, ay 148 eb.

⁴⁵ Axa eb taynem puerta, yinatil Salum eb, eb yet Ater, eb yet Talmón, eb yet Acub, eb yet Hatita c'al eb yet Sobai, ay 138 eb yin masanil.

⁴⁶ Axa eb max ak'wi serbil bay templo, a ton eb yinatil Ziha, eb yet Hasufa, eb yet Tabaot, ⁴⁷ eb yet Queros, eb yet Siaha, eb yet Padón, ⁴⁸ eb yet Lebana, eb yet Hagaba, eb yet Salmái, ⁴⁹ eb yet Hanán, eb yet Gidel, eb yet Gahar.

⁵⁰ Eb yet Reaía, eb yet Rezín, eb yet Necoda, ⁵¹ eb yet Gazam, eb yet Uza, eb yet Paseah, ⁵² eb yet Besai, eb Neunim, eb Nefusim, ⁵³ eb yet Bacbuc, eb yet Hacufa, eb yet Harhur, ⁵⁴ eb yet Bazlut, eb yet Mehida, eb yet Harsa, ⁵⁵ eb yet Barcos, eb yet Sísara, eb yet Tema, ⁵⁶ eb yet Neziá c'al yetok eb yet Hatifa.

⁵⁷ Axa eb yak'omal serbil Salomón, a ton eb yinatil Sotai, eb yet Soferet, eb yet Peruda, ⁵⁸ eb yet Jahala, eb yet Darcón, eb yet Gidel, ⁵⁹ eb yet Sefatías, eb yet Hatil, eb yet Poqueret-hazebaim c'al eb yet Amón. ⁶⁰ A masanil eb max ak'wi serbil bay templo c'al eb yinatil eb yak'omal serbil Salomón ay 392 eb yin masanil.

⁶¹ A eb max tit bay Tel-mela, bay Tel-harsa, bay Querub, bay Adón, c'al bay Imer, maj je' tx'oxon el ba eb tatol Israel eb yuj yinatil, a ton eb ti': ⁶² Eb yinatil Delaía, eb yet Tobías, c'al yetok eb yet Necoda. A eb tu' ay 642 eb.

⁶³ Eb yican ba yetok eb sacerdote, a ton eb ti': Eb yinatil Habaía, eb yet Cos, c'al eb yet Barzilai, a ton jun tu' max nupay yetok cutz'in Barzilai aj Galaad, xan a bi is ni' tu' max yikcan ajok. ⁶⁴ A eb tu' max say yil eb is bi tu' bay yul libroal bay tz'ibbilcan bi eb ichmamej, palta maj ilchaj yuj eb bay tu', caytu' max yun yilay el eb yin sacerdoteal. ⁶⁵ Max yalon cham gobernador tol c'am chi je' loon eb ixim pan tol yet Dios yayji ocok, masantac'al ok yal yilon junok sacerdote yin Urim c'al yin Tumim tatol yel yinatil Aarón eb.

⁶⁶ Ay 42,360 eb anima tu' yin masanil. ⁶⁷ C'amoc eb nak chekbej c'al eb ix chekbej tz'akilok. A eb tu' ay 7,337 eb yin masanil. Ay c'apax 245 eb winak c'al eb ix chi bitni. ⁶⁸ Ay c'apax 736 no caballo, 245 no mula, ⁶⁹ ay 435 no camello c'al yetok 6,720 no burro.

⁷⁰ Ay juntzan eb yajaw yayji xol yican max yak' eb sabalej yuj watx'jubal templo. Max yak' cham gobernador bay tesorería 16 libra

ch'en oro, yetok 50 mimek sec' c'al yetok 530 an pichilej yet eb sacerdote. ⁷¹C'al juntzanxa eb yajaw yayji xol yican max yak' eb bay tesorería 337 libra ch'en oro c'al yetok 3,215 libra ch'en plata. ⁷²Axa janic'okxa eb conob max yak' eb 337 libra ch'en oro, 24 quintal ch'en plata, c'al yetok 67 an pichilej yet eb sacerdote.

⁷³A eb sacerdote yetok eb levita, eb taynem puerta, eb chi bitni, c'al yetok masanil eb anima ay bay conob tu', eb chi ak'wi serbil bay templo, c'al yetok masanil eb israel max watx'nej ay cajan ba eb bay yulak is conobal, xi yul tx'an tu'.

Max yawtej Esdras ley satak masanil eb anima

8 Axa yet max el yich yet is suk xajaw, mayal tz'aknaj yapni oc eb jet conob bay is lugar. ¹Axca tu' max yun wajban ba masanil conob bay Jerusalén bay ti' puerta bay chi eltok eb ix ix ioj aej. Cax max yalon eb bay cham Esdras tol chi yitek tx'an yunal ley yet cham Moisés, ak'bil yuj Jehová bay co conob. ²A yet babel c'ual yet jun xajaw tu' max yiontek cham sacerdote Esdras tx'an yunal ley bay satak eb anima wajan ec' tu', masanil eb winak yetok masanil eb ix ix, c'al yetok masanil eb unin tol chixa nachaj el yuj ayic' bay tu'. ³Max chaon oc cham yawten tx'an yet k'inibalil masantac'al yet max oc chuman, satak masanil anima bay tu'.

Masanil eb conob tu' caw wal watx' max yun taynen yab eb tzet ayay yul tx'an yunal ley tu'. ⁴Watx'nebil aj jun te plataforma bay lecan ajtok cham Esdras. Ay c'apax ajtok cham Matatías, cham Sema, cham Anías, cham Urías, cham Hilcías c'al cham Maasías, bay is watx' k'ab cham. Axa pax bay is q'uxan k'ab cham xin, a tu' ay pax ajtok cham Pedaías, cham Misael, cham Malquías, cham Hasum, cham Hasbadana, cham Zacarías c'al yetok cham Mesulam. ⁵Max yil masanil conob jakontok cham Esdras tx'an un, yujtol can bay ayajtok cham. A yet max jakon cham tx'an tu', cax max aj lecan masanil eb anima. ⁶Max yalon cham Esdras watx' k'anej bay Jehová, cham Dios Miman Yayji Ocok. Cax masanil eb anima ayaj is k'ab eb can max yalon eb: Yunokabi, xi eb. Ayman max ay nojan eb sat tx'otx' yuj yoc eb yin ayilal bay Jehová.

⁷Axa eb cham levita: a ton Josué, Bani, Serebías, Jamín, Acub, Sabetai, Hodías, Maasías, Kelita, Azarías, Jozabed, Hanán c'al yetok Pelaías, a eb ti' max watx' alnen el bay eb conob tzet chi yal elapnok ley tu' cax ayc'al ec' eb conob bay is lugar tu'. ⁸Max yawten eb tx'an yunal ley Dios tu' yin jichanil, cax max coc'alnen yin is ti', yet chi nachaj el yuj eb anima tzet chi yal tx'an ley tu'. ⁹Masanil eb anima max ok'ajok yuj max yab eb tzet wal yayji oc ley. Axa cham Nehemías tol gobernador yayji oc bay tu', c'al cham sacerdote Esdras tol mehtëtol c'apaxok, c'al yetok eb levita chi cuyon eb conob tu', max yalon eb tol c'amokab chi oc cusc'ulal yin eb anima tu', yujtol a jun c'ual tu' yet Jehová co Diosal yayji. ¹⁰Yetok c'apax junxa, max yalon cham

Nehemías bay eb: Asek, cax che loon loj yet k'in, c'al e yuq'uen ac' vino yin tzalojc'ulalil, cax che yawten eb anima c'am is lobej watx'nebil low e yetok, yujtol a jun c'ual ti' yet Cham Jajawil yayji ocok. C'amokabc'al chex cusi, yujtol a tzalojc'ulalil chi yak' Jehová, a ton wal ayoc jipomalok, xi.

¹¹Max tenchanelay c'apax eb conob yuj eb levita: Bekek e yok'i yujtol yet Jehová yayji jun c'ual ti', c'amokab mac chi cusi, xi eb. ¹²Cax max toj masanil eb conob lowok c'al yuq'uena', max yawtelen ba eb lowok. Caw wal max oc tzalojc'ulalil yin is yanimail eb, yujtol max cam wal yaben eb tzet max yal is cuybanil.

Max cha' eb k'inal chinama

¹³A yet junxa c'ual max wajban ba eb yajawil yayji yin junjun makan tol yicanc'al ba xol conob masanil, eb sacerdote c'al eb levita, yetok cham Esdras, yuj cuyon eb tzet wal yelapnok ley. ¹⁴Axca tu' max yun nachaj el yul tx'an un tu' yuj eb tol a Jehová max alon bay cham Moisés tol chi ayji ec' eb israel bay yulak chinama yin k'in yet is suk xajaw. ¹⁵Axca tu' max yun yal-lay el xolak conob c'al bay Jerusalén tol chi toj eb anima bay xolak te' yiontek eb is k'ablak te olivo, te arrayán, an palma, ma junokxa tzanc'al tzet teal tol ay is k'ablak watx' chi oc yin chinamail, axca yalon yul tx'an yunal ley. ¹⁶Cax max toj eb anima sayon is k'ablak te tu', axa yet max jayoc eb xin, max watx'nen aj eb is chinama bay yibanlak patil is yatut, ma bay yamak'il yatut, c'al bay yamak'il is templo Dios, c'al bay lugarlak ti' puertail bay chi el eb ix ix ioj aej, c'al bay puertail Efraín. ¹⁷Masanil eb anima meltzojnaktek bay Babilonia max watx'nej aj is chinama, cax max octok eb yul. Atax yul is tiempoal Josué is c'ajol Nun, c'amc'al bay max uj axca jun ti', yuj wal tu' xan caw wal max tzaloj aj eb anima. ¹⁸Cax max yawten cham Esdras tx'an un tu' junjunc'al c'u masantac'al chi tz'aknaj ukeb c'ual jun k'in tu'. Axa yet is waxakeb c'ual xin, max wajban pax ba eb yin yoc eb yin ayilal bay Jehová axca yalon ley tu'.

Max yalil Esdras is mul eb israel

9 ¹A yet c'ual 24 yet is suk xajaw tu', max wajbaj oc ba masanil eb israel yin yoc eb yin c'ajbanc'ulal, c'al pichon ba eb yetok el pichilej, c'al yaon ajtok eb pokok yiban jolom. ²Max pojon el ba eb xol eb tx'ok conobal. Max aj lecan eb yin yalon eb is mul, c'al yetok is mul eb yichmam eb. ³Yak'ban ayic' eb bay is lugar tu', oxeb wal hora max awtelay aj tx'an yunal ley Jehová xol eb, axa yin oxebxa hora, max yal eb is mul c'al yion ay ba eb bay Cham. ⁴A eb levita, a ton Josué, Binuy, Cadmiel, Sebanías, Buni, Serebías, Bani, c'al Quenani max ajtok eb bay can, axa yaj yaw eb yin ipejal bay Jehová Dios. ⁵Axa yalon eb levita, a ton Josué, Cadmiel, Binuy, Hasabnías, Serebías, Hodías, Sebanías c'al Petaías axca ti': Ajanek wanok che yalon watx' k'anej bay Jehová co Diosal yin tojbalk'inal. Ach Mamin, al-lay okab watx' k'anej en yin bital, yujtol caw wal mimanbil a binaji.

⁶Mamin Jehová, asannej ach toc'al ta ayach ec'ok, c'am junokxa. Ach ti' max a watx'nej satcan tol txequel, c'al man txequelok, masanil waycan ach max a watx'nej. Ach max a watx'nej c'apax tx'otx' tx'otx' ti' c'al yetok masanil tzet yetal ay bay. Max a watx'nej c'apax a' mar yetokc'al masanil tzet yetal ay bay a'. Ach wal chak' yiquisal masanil tzet yetal, yuj tu' xan chi oc eb ángel yin ayilal ayach.

⁷Mamin Jehová, ach ton wal max a sic'can el Abram. Ach max eiltek bay Ur bay conob eb caldeo, cax max ak'on yik Abraham. ⁸Max ela' tol yikemc'al ayach, xan max a watx'nej jun a trato yetok. Tol ok ak' bay is yinatil cham tx'otx' tx'otx' yet eb cananeo, eb hitita, eb amorreo, eb ferezeo, eb jebuseo c'al eb gergeseo. Mayal ak' yun a k'anej yujtol chi yunc'al bay chala'. ⁹Max el c'apaxok tzetbil max yun yaben yail eb jichmam on bay Egipto, max aben yaj yaw eb bay ti' a' Cakyin Mar. ¹⁰Max a watx'nej milagro c'ayubtakxac'al yin cham reyal Egipto, c'al yin masanil eb is chekbej, c'al yin masanil anima ay bay yul is conobal, yujtol max ela' tzet wal max yun yetnelay eb jet israelal yuj is ch'aanilal eb. Cay wal tu' max yun eon a mimanbilal chi binaj tinani'. ¹¹Max a pojay nan a' mar tu' satak eb, max ec'tok eb bay takin tx'otx'. Axa eb tzakan oc yintak eb tu' xin, max tojcan eb yich a' axca wal chi yun tojcan junok ch'en ch'en bay najabil yich a'. ¹²Lajwi tu' max ekban eb yet c'ualil yetok jun miman asun, axa yet ak'balil yetok jun miman k'ak'ej max ekbaj eb, a ton yuj jun tu' max a tzeztanej is be eb bayc'al max ca toj eb.

¹³Lajwi tu' xin, max ach tit bay satcan max ach ayol bay jolom witz Sinaí, axa a k'anjab aytek bay eb. Max ak'on ley tol tojol bay eb, c'al cuybanilej tol caw wal yel, yetokc'al chekbanilej caw wal watx'. ¹⁴Max a cuyon eb tol chi yikej eb c'ual xewilal yuj ach yion aj can eb, max ak'on chekbanilej c'al cuybanilej bay Moisés, axa cham max alon bay eb. ¹⁵Max ak'on loj yet satcan bay eb yet ay wajil eb, c'al aej max eltek sat ch'en yet max ec' takintial eb yuj. Lajwi tu' max alon bay eb tol chi octok cajan eb bay tx'otx' tx'otx' max ak' a ti' ak'on bay eb.

¹⁶Palta a eb jichmam on tu' caw wal ch'aan eb, pit max yut ba eb, tokwal max cha yab eb a chekbanil. ¹⁷Maj yikej eb c'al naontek eb masanil jantak mimek tzet yetal max on yuj is watx'ilok eb. Caw wal pit max yut ba eb. A ti' yet eb, tol max yaoc eb jun is yajawil yet max ikbelay meltzoj eb yin mosejal bay Egipto junelxa yaloni. Palta ach ti' Dios tol ak'om ach mimanc'ulal, Dios ach tol c'un cusaj a c'ul. Miman a c'ul. Ay wal a camc'ulal, maj wal yal a c'ul max a bekcan eb. ¹⁸Toltax a yet max watx'nen eb jun ch'en yechel wacax, max yalon wal eb tolal a jun tu' is diosal eb max ion eltek eb bay Egipto, cax max yaon wal oc eb is mul yelxac'al yob, ¹⁹palta ach ti' yetok a mimanc'ulal, majc'al a bekcan eb bay takin tx'otx'. A jun miman asun maj el satak eb yet c'ualil yuj yikbelay eb yuj bay yulak be, tamwal jun miman k'ak'ej maj el satak eb yet ak'balil yuj tzeztelay eb yuj bay max ca toj eb. ²⁰Max ak' a Espíritu Watx' bay eb

yuj cuylay eb yuj. A maná max ak' lo eb; c'am jabok max majax aj bay eb, max ak'on aej yuc' eb yuj yec'tok takintial eb. ²¹Max ak'c'al lobej eb bay takin tx'otx' yin cawinak abil. C'am wal jabok tzet yetal max majax aj bay eb, maj lajwok el is pichil eb yin, tamwal max malaj yakan eb yuj beyil.

²²Max ak' wal conoblak c'al nacionlak bay eb. Max a pojón ec' is parcela eb, max chaon eb satak bay Hesbón, a ton bay jun nación tu' bay ayoc Sehón yin reyal, c'al bay Basán, a ton c'apax bay ayoc Og yin reyal. ²³Max ak'on xiwil yuninal eb axcaxac'al bisil waycan bay satcan, max eontok eb yin chaon is satak bay max ak' a ti' ak'on bay eb jichmam on. ²⁴Max oc eb yuninal eb yion tx'otx' Canaán. Ach max ak' ayc'ay eb cajiom bay jun tx'otx' tu' satak eb. A eb rey c'al eb anima bay jun makan tx'otx' tu' max aoc yul k'ab eb, max utlay wal eb cananeo tu' yuj eb jichmam on, axca bay max el yin c'ul eb. ²⁵Max yion c'apax eb conoblak tol caw wal watx' cawxi, c'al tx'otx' tx'otx' caw wal watx' chi yun yawojal, c'al na tol caw wal nojnak yuj tzetak yetal watx'. Max yion c'apax eb uc'bala', uva, olivo, c'al juntzanxa te te' tol chi yak' sat. Max low eb masantac'al max yal noj c'ul eb, max bak'echbi el eb, max yak' wal tzalobjok eb c'ul yuj a watx'c'ulal.

²⁶A eb jichmam on pit max yut ba eb, max oc eb tenomtakil ayach, max yintaknej el eb a ley. A eb a chekbej, tol chi tenchanen eb c'al yaloni tol chi yaoc ba eb yul a k'ab max mak'lay cam eb yuj eb. Yelxac'al miman max yun yoc mul eb ayach. ²⁷Yuj wal tu' xan max aoc eb yul k'ab eb ajc'ul, a ton eb tu' max etnen eb. A wal yet ayoc eb yin some'ulal, max k'anón eb a colwal, axa pax ach xin, yuj wal a miman yabenc'ulal max ab is tewilal eb tac'al bay satcan. Max ak'on eb winak tol max colon el eb bay eb chi etnen eb tu'.

²⁸Axca tu xin, a yet ayoc eb yin junc'ulal junelxa, cax chi meltzój pax eb yunen yobtakil a satak. Yuj tu' xan max a bek pax ayc'ay eb yul k'ab eb is yajc'ul, a ton eb tu' max aon oc eb yin yailal. Lajwi tu' max k'anón pax eb a colwal. Yujtol ay a yabenc'ulal max aben pax tewilal eb tac'al bay satcan. Xiwil el max a colcan el eb. ²⁹Max alon bay eb tol chi yikej eb a ley. Palta ch'aañc'al max yut ba eb, xan maj yikej eb a chekbanil. Max yetnen el eb a ley tol chi ak'on is cawil eb chi ikeni. Tenomtak eb, pit max yut ba eb, majc'al cha yab eb. ³⁰Xiwil abilal max ak'c'al mimanc'ulal yin eb, max ak'onc'al yojtaknej el eb yuj a Espíritu c'al yuj eb a chekbej. Palta majc'al cha yab eb. Yuj tu' xan max acan oc eb yul k'ab juntzanxa nacionlak. ³¹Palta xin, yuj wal a yabenc'ulal xan maj ak'xac'al lajwok el eb masanil, tamwal max a bekcan eb, yujtol ach ti' Dios ach tol ay a yabenc'ulal, c'al a watx'c'ulal.

³²Yuj wal tu', ach co Diosal tol miman ayji ocok, ay epalil, a moj tol ay co xiwc'ulal ayach, tol c'amc'al chi toj c'ayc'ulal a trato oj yuj a miman camc'ulal. Manokab yaynakilok yayji oc yul a sat is yatakilal eb co reyal on, c'al eb co yajawil on, eb sacerdote, eb a chekbej, c'al eb jichmam on c'apaxok, c'al yetok masanil eb jet conob on. Max yabc'al yail eb yettaxc'al yul is tiempoal eb reyal Asiria masantac'al yet tinani'. ³³Palta

c'amc'al tzet yetal man watx'ok chon yin tzet yetal chi ec'tok jiban. Ach ti' watx'c'al tzet chonej, xal on xin, caw wal yobc'al tzet chi jun on. ³⁴A eb co reyal on, eb co yajawil on, c'al eb sacerdote, yetoke'al eb jichmam on, majc'al cha yab eb, tamwal max yikej eb a chekbanil axcac'al max yun yal-lay bay eb. ³⁵Palta axa wal max yun xin, a bay is makbej eb, maj wal oc eb yin ayilal ayach, tamwal max bekcan eb is yob beybalil, caxc'al mi tol xiwil tzet yetal max ak' bay eb, cax max ak'on miman tx'otx' tx'otx' tol caw wal yax sat ti' bay eb, bay jun nación max ak' bay eb tu'.

³⁶Ilab wal jili tinani', mayal wal on meltzoy oc yin mosejal bay tx'otx' tx'otx' max ak' bay eb jichmam on yet chi lo eb sat yawoj. ³⁷A wal sat awoj tol xiwil chi yak'a' yet eb rey yayji ocok, a ton eb max acan oc jiban on yuj wal co mul chi oqui. Chi yun eb tzet chi yochej c'ul jin on, c'al yin co jobbejal no' on, yuj tu' xan caw wal ayon oc yin bilc'ulal tinani'.

³⁸Yuj wal tu' xan ayon ti' chi jak' co ti' chi tz'ibelaycanok tol ok jikej wal yin yel, yuj tu' xan a tx'an un tu' chi oc sello c'al is bi eb co yajawil, eb levita c'al eb sacerdote yin, xi eb yin is txaj.

Tixtak is bi eb max yak' ti' tol ok yikej

10 ¹A ton juntzan eb anima max yaoc is bi yin tx'an un max tz'ibelay tu'. Ayin Nehemías c'ajol in Hacialías, ayin ton gobernador wayji. Max yak' c'apax eb ti' is ti': a ton Sedequías, ²Seraías, Azarías, Jeremías. ³Pasur, Amarías, Malquías, ⁴Hatús, Sebanías, Maluc, ⁵Harim, Meremot, Obadías, ⁶Daniel, Ginetón, Baruc, ⁷Mesulam, Abías, Mijamín, ⁸Maasías, Bilgai, c'al Semaías. A ton juntzan eb ti' tol sacerdote yayji.

⁹Axa eb levita max yak' c'apax is ti' a ton: Josué c'ajol Azanías, Binuy is yinatil Henadad, c'al Cadmiel; ¹⁰yetok eb yet levitail, a ton: Sebanías, Hodías, Kelita, Pelaías, Hanán, ¹¹Micaías, Rehob, Hasabías, ¹²Zacur, Serebías, Sebanías, ¹³Hodías, Bani, c'al Beninu.

¹⁴A pax eb ayoc yin yajawil bay nación tu': a ton Paros, Pahat-moab, Elam, Zatu, Bani, ¹⁵Buni, Azgad, Bebai, ¹⁶Adonías, Bigvai, Adín, ¹⁷Ater, Ezequías, Azur, ¹⁸Hodías, Hasum, Bezai, ¹⁹Harif, Anatot, Nebai, ²⁰Magpiás, Mesulam, Hezir ²¹Mesezabeel, Sadoc, Jadúa, ²²Pelatías, Hanán, Anaías, ²³Oseas, Hananías, Hasub, ²⁴Halohe, Pilha, Sobec, ²⁵Rehum, Hasabna, Maasías, ²⁶Ahías, Hanán, Anán, ²⁷Maluc, Harim c'al Baana.

Juntzanxa eb conob max yak' ti' bay Dios

²⁸Axa juntzanxa conob, a ton eb sacerdote, eb levita, eb taynem puerta, eb chi bitni, eb chi ak'wi serbil bay templo, yetokc'al masanil eb anima maxax pojil ba xol eb tx'ok conobal bay juntzan lugar tu' yet chi yikej eb ley Dios, max yak' eb is ti' yetok yistzil, yetok c'ajol, c'al yetok cutz'in, eb ayxa is nabal. ²⁹Max wajban oc ba eb yetok yican c'al yetok eb yajaw, max yak'on eb ti' yunen axca yalon ley Dios albil yuj cham Moisés is chekbej. Max yalon eb

tol ok yikej eb wal yin watx' is chekbanil c'al ley Jehová Cham Jajawil. ³⁰Yuj tu' majxa jak' c'apax co cutz'in yin nupayil yetok eb tx'ok conobal, tamwal ok co cha c'apax nupay is cutz'in eb yetok eb co c'ajol. ³¹Ta chi jayoc eb tx'ok conobal ul txonon masanil pojanil sat yawoj yet c'ual xewilal, man ok co man bay eb jabok, a ton yet c'ual xewilal c'al yet juntzanxa c'ual k'in. Yet is suk abil ok cancan tx'otx' tx'otx' xewok, cax ok jak'on tan jec eb jequelwom ayon.

³²Yetok c'apaxok ok jaoc jiban tol ok jak' caneb gramo ch'en plata junjun on yin junjun abil yet chi oc gastook templo co Diosal. ³³A ton yuj ixim pan chi ak'layi, c'al ofrenda yet junjun c'u, yetok ixim trigo, yetok xajanbal chi ak'lay tz'a junjun c'u, yetok xajanbal yet c'ual xewilal, c'al yetok yet unin xajaw, c'al yetok juntzanxa k'in chi ec'c'alta' junjun abil. Yetokc'al juntzanxa ofrenda, yetok c'apax xajanbal yuj yak'lay tan co mul ayon israel on ti', c'al yuj joc ayilal bay templo co Diosal.

³⁴Yetok c'apaxok max jaoc suerte jin yin junjun makan jinatil, caxc'al sacerdote on, ma levita on, ma comon anima on, yet watx' chi jila' tzet tiempoal yet junjun abil ok jak' te si' yet templo co Diosal, yet chi tz'a te' bay altar yet Jehová co Diosal axca tz'ibelaycan bay ley. ³⁵Yetok c'apaxok max jak' co ti' tol ok jitok co babel sat awoj chi el bay co tx'otx' c'al babel sat co te' awbil yet junjun abil bay templo co Diosal. ³⁶Cax ok jion c'apaxok eb co babel c'ajol c'al babel yune' co wacax, c'al co calnel, bay is templo co Diosal satak eb sacerdote chi ak'wi serbil bay tu' axca wal tz'ibelaycan bay ley. ³⁷Max jak'on c'apax co ti' tol ok jitok bay c'uanbal yet eb sacerdote co colwal, a ton ixim co babel harina c'al babel sat co awbejal te', yetok c'apax co babel vino c'al babel aceite. Cax ok jiontok bay eb levita is diezmoal sat jawoj, tutun tol a eb chi chaon diezmoal tzet chi ji' bay co tx'otx' bay junjun conob bay chon mulnaji.

³⁸A yet ok tok eb levita chaoj diezmo tu', yowalil chi toj junok sacerdote is yinatil Aarón yetok eb. Axa eb levita tu' ok iontok bay c'uanbal templo co Diosal is diezmoal diezmo chi cha eb. ³⁹Yujtol ayon israel on ti' c'al eb levita ok jitok waj trigo, yetok vino, c'al aceite, bay c'uanbal, a ton bay ayic' masanil tzet yetal yet templo, a ton bay tu' ayic' eb sacerdote ayoc yin opiso, eb taynem puerta, c'al eb chi bitni. Caywal tu' chi yun jak'on co ti' tol man ok co bekan is templo co Diosal.

Eb cajiyo bay Jerusalén

(1 Cr 9.1-34)

11 ¹A eb yajaw bay jun nación ti' max cajay eb bay Jerusalén. Axa juntzanxa eb conob max yaon oc eb suerte yet watx' chi toj cajay junok yin junjun lajoneb nail bay Jerusalén, a ton bay jun conob tol yet Dios yayji ocok. Axa balonebxa nail xin, chi cancan eb bay juntzanxa conoblak. ²Lajwi tu xin, max yalon eb conob watx' k'anej yin masanil eb max yala' tol bekan c'ul cajay bay Jerusalén.

³⁻⁴Bay yul makbej Judá max cajay eb sacerdote, eb levita, eb chi ak'wi serbil bay templo, eb yinatil eb max ak'wi serbil bay Salomón, yetokc'al juntzanxa eb

jet israelal, junjunc'al bay is conob c'al bay is satak. Ay c'apax jaywanok eb yet Judá c'al eb yet Benjamín max cajay can bay Jerusalén. A ton listail eb mimek winak yul makbej Judá max jay cajay bay Jerusalén ti'. A xol eb yinatil Judá, a Ataías yetok Maasías yajaw yayji eb. A listail eb yichmam Ataías yin txolilal a ton Uzías, Zacarías, Amarías, Sefatías, Mahalaleel, yinatil Fares eb ti'. ⁵A listail eb yichmam Maasías yin txolilal, a ton Baruc, Colhoze, Hazaías, Adaías, Joiarib, Zacarías, yinatil Siloni eb ti'. ⁶A masanil eb yinatil Fares max can cajan bay Jerusalén, ay 468 eb. Masanil juntzan ti' soldado caw wal jalan yin ak'oj owal.

⁷Axa pax xol eb yet Benjamín, a Salú ayoc yajawilal. A listail eb yichmam Salú yin txolilal, a ton Mesulam, Joed, Pedaías, Colaías, Maasías, Itiel, Jesaías. ⁸Ac'ala' c'apax xol eb yet Benjamín, yajaw yayji Gabai c'al Salai, yaynakil eb yintak Salú. 928 eb yet Benjamín yin masanil. ⁹Axa is comandante eb, a ton Joel c'ajol Zicri, axa Judá c'ajol Senúa, a jun tu' yet is cab comandante yayji oc bay conob tu'.

¹⁰⁻¹⁴A xol eb sacerdote, yajaw yayji Jedaías c'ajol Joiarib, Jaquín, Seraías, Adaías, c'al Amasai. A listail eb yichmam Seraías yin txolilal, a ton Hilecías, Mesulam, Sadoc, Meraiot, c'al Ahitob, cham max yak' sat sacerdoteal bay templo. 822 eb yicanc'al ba yetok Jedaías, Jaquín c'al Seraías chi mulnaj bay templo. A listail eb yichmam Adaías yin txolilal, a ton Jeroham, Pelalías, Amsi, Zacarías, Pasur, Malquías. 242 eb yicanc'al ba yetok Adaías. A listail eb yichmam Amasai yin txolilal, a ton Azareel, Azai, Mesilemot, Imer. 128 eb winak yicanc'al ba yetok Amasai, tol soldado jalan yin ak'oj owal. A Zabdiel c'ajol Gedolim, sat yajaw yayji xol eb sacerdote.

¹⁵⁻¹⁷A xol eb levita, yajaw yayji Semaías, Sabetai, Jozabad, Matanías, Bacbuquías c'al Abda. A listail eb yichmam Semaías yin txolilal a ton Hasub, Azricam, Hasabías, Buni. A Sabetai c'al Jozabad ayoc eb yilomalok mulnajil yinlak templo. A Matanías c'ajol Micaía, yitxiquin Zabdi, yinatil Asaf ayoc ikbajwomal xol eb levita chi bitnen watx' k'anej c'al aloj yuj diosal yet yorail txaj. A Bacbuquías, colwajwom yayji bay Matanías. A Abda c'ajol Samúa, yitxiquin Galal yinatil Jedutún. ¹⁸A masanil eb levita max can bay Jerusalén conob Dios, ay 284 eb yin masanil.

¹⁹Axa eb taynem puerta: a ton Acub, Talmón c'al eb yican. A ton eb chi ilon bay puerta ay 172 eb yin masanil.

²⁰Axa juntzanxa eb jet israelal yetokc'al jaywanokxa eb sacerdote yetok juntzanxa eb levita, max cajaycan ec' eb bay juntzan conoblak bay yul yet Judá, junjunc'al bay is satak. ²¹A eb mulnajwom bay templo, a tu' max cajay ec' eb bay Ofel yul makbej Jerusalén. A Ziha c'al Gispa max ikban eb yin mulnajil tu'.

²²A jun mac yajaw yayji xol eb levita bay Jerusalén, a ton Uzi. A listail eb yichmam Uzi yin txolilal, a ton Bani, Hasabías, Matanías, Micaía, a ton eb yinatil Asaf. A xol eb yinatil Asaf tu', ay eb chi ikban bit bay templo Dios. ²³A cham rey David max aloncanok tzetbil chi yun yoc junjun makan eb chi bitni yin txolilal.

²⁴A mactxel chi oc satak cham rey yuj tzanc'al tzet k'anejal yet eb conob, a ton Petaías, c'ajol Mesezabeel, a yinatil Zera c'ajol Judá.

Juntzanxa conob bay max cajay eb

²⁵A juntzanok eb yin is tribual Judá max cajay eb bay Quiriat-arba, Dibón, Jecabseel, ²⁶Josué, Molada, Bet-pelet, ²⁷Hazar-sual, Beerseba, ²⁸Siclag, Mecona, ²⁹En-rimón, Zora, Jarmut, ³⁰Zanoa, Adulam, Laquis c'al Azeca, yetokc'al yaldeail c'al bay chi oc mulnajil. Max ayji eb bay Beerseba masantac'al bay jobeal yet Hinom. ³¹Axa eb yin is tribual Benjamín max ayji eb bay Geba, Micmas, Aía, Betel c'al yetok is yaldeail. ³²Yetok c'apax bay Anatot, Nob, Ananías, ³³Hazor, Ramá, Gitaim, ³⁴Hadid, Seboím, Nebalat, ³⁵Lod, Ono c'al bay jobeal yet eb watx'nem ch'en. ³⁶Ay c'apax eb levita max cha is satak yul yet Judá c'al yul yet Benjamín.

Listail eb sacerdote yetok eb levita

12 ¹A ton juntzan eb sacerdote yetok eb levita max meltzoy yetok Zorobabel, c'ajol Salatiel, c'al yetok Josué:

A eb sacerdote, a ton eb ti': Seraías, Jeremías, Esdras, ²Amarías, Maluc, Hatús, ³Secanías, Rehum, Meremot, ⁴Ido, Gineto, Abías, ⁵Mijamín, Maadías, Bilga, ⁶Semaías, Joiarib, Jedaías, ⁷Salú, Amoc, Hilcías c'al Jedaías, a ton juntzan eb ti' yajaw yayji xol eb yet sacerdoteal eb yul is tiempoal Josué.

⁸Axa pax eb levita, a ton eb ti': Josué, Binuy, Cadmiel, Serebías, Judá, c'al Matanías, a ton eb tu' yetok juntzanxa eb ajun yetok eb, a eb ayoc yin bitnen watx' k'anej bay Dios. ⁹Axa Bacbuquías yetokc'al Uni, yican ba eb yetok eb, chi oc waan eb satak eb yet chi bitni eb.

¹⁰A listail eb yinatil Josué yin txolilal, a ton Joiacim, Eliasib, ¹¹Joiada, Johanán, c'al Jadúa.

¹²⁻²¹A ton is listail eb sacerdote yajaw yayji oc yin junjun makan eb yet sacerdoteal eb yul is tiempoal cham sat sacerdote Joiacim:

Yajaw Makan

Meraías Seraías
 Hananías Jeremías
 Mesulam Esdras
 Johanán Amarías
 Jonatán Melicú
 José Sebanías
 Adna Harim
 Helcai Meraiot
 Zacarías Ido
 Mesulam Ginetón
 Zicri Abías

..., Miniamín
 Piltai Moadías
 Samúa Bilga
 Jonatán Semaías
 Matenai Joiarib
 Uzi Jedaías
 Calai Salai
 Eber Amoc
 Hasabías Hilcías
 Natanael Jedaías

²²Max tz'ibelay is listail eb levita yajaw yayji yin junjun makan inatilej, c'al eb sacerdote yul is tiempoal Eliasib, Joiada, Johanán c'al Jadúa, tol sat sacerdote yayji oc eb. A jun lista ti' max lajwi tz'ibelay yul is tiempoal Darío aj Persa. ²³Axa pax is listail eb yajaw yayji yin junjun makan yinatil eb levita, ayoc eb tu' yul yunal yabixal templo; max tz'ibelayc'al jun lista tu' masantac'al yul is tiempoal Johanán is yitxiquin Eliasib. ²⁴A eb yajaw yayji xol eb levita chi bitni: a ton Hasabías, Serebías, Jesúa c'ajol Cadmiel. A eb ajun yetok eb, ac-'omba yayji eb yetok eb yet chi bitni eb c'al yalon eb yuj diosal bay Jehová yet ayoc eb yin yopiso, axca max yun yalon cham rey David chekbej Dios. ²⁵Axa eb taynemal juntzan cuarto yet c'uanbal cawilal puertail templo, a ton Matanías, Bacbuquías, Obadías, Mesulam, Talmón, c'al Acub. ²⁶A eb mayal binaj ti' ayic' eb yul is tiempoal Joiacim, c'ajol Josué, yitxiquin Josadac. A ton yul is tiempoal cham gobernador Nehemías, c'al cham sacerdote c'al meñtol Esdras.

Max alaycan oc muralla yul k'ab Dios

²⁷A yet max apni oc c'ual yalaycan oc murallail Jerusalén yul k'ab Dios, max awtelaytek eb levita tzanc'al baytal cajan eb, max jayoc eb bay Jerusalén yuj chalay k'inal muralla, yet chi tzaloj eb yin yalon eb watx' k'anej, c'al bitni eb yetok platillo, arpa, c'al lira. ²⁸Xan a eb levita chi bitni tu', max tit eb bay cawilal Jerusalén c'al bay yaldeail yet Netofa, ²⁹c'al bay Bet-gilgal, c'al bay yulak is makbej Geba c'al bay Azmavet, yujtol a eb chi bitni tu' max watx'nej ay ba eb yin aldeail bay yinlak Jerusalén. ³⁰Caytu' max yun watx'nen ba eb sacerdote c'al eb levita atac'ala' ley. Lajwi tu' max watx'nen c'apax ba eb conob, caytu' max yun watx'nen c'apax eb puertail conob c'al is muralla atac'ala' ley.

³¹Max lajwi tu' max in chekon ajtok eb yajaw yet Judá bay yiban muralla, cax max waon oc cab mimek coro yin txolilal yuj aloj yuj diosalil. A jun babel coro max toj yiban muralla bay yetc'ulal co watx', bay yetc'ulal puerta bay chi bet cancan k'alem. ³²Axa yintak coro tu', a tu' tzakan Osaías yetok nanxa eb yajaw bay Judá, ³³yetok Azarías, Esdras, Mesulam, ³⁴Judá, Benjamín, Semaías, c'al Jeremías. ³⁵Ajun c'apax eb sacerdote yetok

trompeta: a ton Zacarías c'ajol Jonatán; axa eb is yichmam, a ton Semaías, Matanías, Micaías, Zacur, c'al Asaf. ³⁶Ajun c'apax juntzan icanejal chi aon oc música yetok eb, a ton Semaías, Azarael, Milalai, Gilalai, Maai, Natanael, Judá c'al Hanani. A ton eb tu' chi aon oc juntzan mitx'k'abej yet música axca yet cham rey David, cham chekbej Dios. A satak eb tu' babel toj cham meǵtol Esdras. ³⁷Max ec' eb yiban puertail bay nuk' aej, cax max beyc'altoj eb satak bay yiban muralla. Max ajtok eb bay jun k'ochbe yetc'ulal conob David, c'al bay cawilal yiban is despachoben cham, masantac'al bay puertail bay chi eltok eb ix ix ioj aej ay bay yetc'ulal bay chi ajol c'u.

³⁸Axa junxa yet is cab coro, a tu' max tojcan bay yetc'ulal co q'uexan. Tzakan in yintak junxa coro tu' bay yiban muralla yetok nanxa eb anima, cax chon tojtac'al bay torre chi yik Hornos, max con ec'tok bay muralla caw wal miman sat ³⁹bay puerta chi yik Efraín, bay puerta chi yik Jesana, bay puerta yet no txay, bay torre chi yik Hananeel, c'al bay torre chi yik Hamea, masantac'al bay puerta yet no calnel. Max on oc waan bay puerta yet eb chi taynen bay tu'. ⁴⁰Lajwi tu xin, max apni oc cab coro tu' bay templo Dios. Max in apni c'apax oc yetok nanxa eb yajaw ajun wetok.

⁴¹A eb sacerdote chi xuon trompeta: a ton Eliacim, Maaseías, Miniamín, Micaías, Elioenai, Zacarías, Hananías, ⁴²Maasías, Semaías, Eleazar, Uzi. Johanán, Malquías, Elam, c'al Ezer. Axa jun coro tu' caw wal can max yun bitni eb, max ikbelay eb yuj Izraías.

⁴³A wal yet jun c'ual tu' caw wal xiwilxa xajanbal max ak'layi. Axa eb anima max tzalojbi wal aj eb yujtol a Dios max ak'on jun miman tzalojc'ulal bay eb. Eb ix ix c'al eb unin, caw wal max ayji c'apax ec' eb yin tzalojc'ulal. A jun tzalojc'ulal max uj bay Jerusalén tu' caw wal max ablaytac'al najat.

Lobej eb sacerdote c'al eb levita

⁴⁴A yet jun tiempoal tu' ay juntzan eb max alay oc yin yilomalok c'uanbal bay chi wajay ofrenda, babel sat awoj, c'al yetok diezmo, atac'ala' jantak chi tit bay junjun lugar yul yet junjun conob. A juntzan tu' yet eb sacerdote c'al eb levita, yujtol a eb aj Judá caw wal chi tzaloj eb yetok eb sacerdote c'al yetok eb levita tu', ⁴⁵yujtol a eb tu' max yikej eb yunen atac'ala' yalon ley, c'al yiken eb juntzanxa ley max yal Dios. Axa eb chi aon oc música c'al eb taynem templo, a eb tu' max yikej eb yilon yopiso axca max yun yaloncan cham rey David c'al Salomón is c'ajol. ⁴⁶Axca yet payxa tu' yul is tiempoal cham David c'al Asaf, ay c'apax yajawilal eb chi bitni tu', a ton eb chi bitnen watx' k'anej c'al aloj yuj diosal bay Dios.

⁴⁷A yul is tiempoal Zorobabel c'al Nehemías, junjunc'al c'u chi yak'on eb conob lobej eb chi bitni c'al eb chi taynen templo. Chi ak'lay c'apax loj bay juntzanxa eb levita axcac'al yet eb t'inan chaoni. Axa eb levita tu' chi ak'on bay eb sacerdote, yinatil Aarón jantak yet eb t'inan chaoni.

A tzet max ca watx'nej cham Nehemías

13 ¹A yet jun tiempoal tu' max awtelay aj tx'an libro yet cham Moisés xol anima. A bay tu' max ilchaji tol a eb amonita c'al eb moabita c'am bak'in chi je' yayji ec' eb xol is conob Dios, ²(yujtol a eb tu' maj eltok eb chaon eb jet conob Israel yetok loj uq'ueja'. A ti' yet eb, tol max man eb Balaam yet chi toj yalon el catab k'anej yiban eb, caxc'al mi a co Diosal max q'uex oc jun catab k'anej tu' yin watx' k'anej.) ³Axca tu' a yet max yaben eb tzet xi tx'an ley tu', max pojon el eb, eb mayal somchajtok xol eb tx'ok conobal tu'.

⁴A yet c'amto chi yun jun tu', max alay oc yiban cham sacerdote Eliasib yilon c'uanbal yet templo co Diosal. Palta a Eliasib tu' watx' yak'on yetok Tobías, xan max yak' jun miman cuarto bay yet chi je' yayji bay tu', ⁵a ton jun miman cuarto bay chi c'uaytac'a ch'en ofrenda yet yalantok, c'al incienso, yetok mitx'k'abej, c'al diezmo yin ixim trigo, c'al yin vino, c'al yin aceite, a ton juntzan tu' tol max al-lay tol chi ak'lay bay eb levita, bay eb chi bitni c'al bay eb taynem puerta. A tu' chi c'ubay c'apax juntzanxa tzet yetal chi ak'lay bay eb sacerdote. ⁶A yet max uj jun ti', ayin ti' c'am in ec' bay Jerusalén, yujtol a yet 32 abilxa yoc Artajerjes yin reyal bay Babilonia, a yet tu' max in meltzotok satak cham yajaw tu'. A yet mayal ec' el janic' tiempoal tu' max in k'an in permiso bay cham rey, ⁷cax max in meltzotek bay Jerusalén ti'. A yet tu' max nachaj el wuj tzet yetal man watx'ok max yun Eliasib yuj yiken tzet max yochej Tobías, tol max yak' wal jun miman cuarto bay templo Dios bay. ⁸A jun tu' caw wal maj cha in c'ul, max in k'okon eltok masanil is tzet yetal Tobías yina. ⁹Lajwi tu' max waloni tol chi sakbanelay el juntzan cuarto tu' atac'ala' ley, cax chi alay pax octok mitx'k'abej yet templo Dios junelxa, yetok ofrenda c'al incienso.

¹⁰Max waben c'apaxok tol maj ak'lay is lobej eb levita, tol a eb levita c'al eb chi bitni, a ton eb ayoc yiban yoc yin ayilal, tolax max toj eb elajok, junjunxac'al eb max tojcan bay is tx'otx'al. ¹¹Caytu' max yun wak'on cuenta eb yajaw yujtol max bek eb yilon templo Dios. Lajwi tu' max in wajban oc eb sacerdote c'al eb levita yin waon pax oc eb yin yopiso junelxa. ¹²Masanil eb aj Judá max yitek eb diezmoal ixim trigo bay chi c'uayi, yetok vino c'al aceite. ¹³Lajwi tu' max waon oc cham sacerdote Selemías yin yilomalok bay chi wajay tu', yetok c'apax cham aj tz'ib Sadoc, yetokc'al jun levita chi yik Pedafías. Max waoc c'apax Hanán yin colwajwomax, a ton c'ajol Zacur yitxiquin Matanías, yujtol caw wal watx' is nabal eb. A ton eb tu' max occan yiban pojon ec' loj xol masanil eb yetbi eb. ¹⁴Ach in Diosal, natek juntzan tzet chi wun ti'. Tokwal ok tok c'ayc'ulal oj masanil tzet yetal max wun yin a templo yuj yoc ayilal ayach.

¹⁵A yet juntzan c'ual tu', max wila' tol ay eb yul yet Judá ti', chi tec'wi uva yet chi watx'nej vino yet c'ual xewilal, cax chi ec' eb ikoj trigo, chi ec' c'apax

no burro ikoj vino, c'al ikojtek racimoal uva, yetok higo, c'al yetok masanil pojanil ikatz, xan a yet c'ual xewilal max yiontek eb juntzan tu' bay Jerusalén. Yuj tu' xan max wak' yowalil txonon eb masanil juntzan tu' yet c'ual xewilal. ¹⁶Yetok c'apax juntzan eb aj Tiro cajan bay Jerusalén, max yi c'apaxtek eb no txay yetokc'al juntzanxa pojanil tzet yetal chi txonlayi; a yet c'ual xewilal max txon eb juntzan tu' bay eb wet israelal bay Jerusalén. ¹⁷Yuj tu' xan max in tenchanej eb yajaw yayji xol eb Judá, max walon bay eb axca ti':

—Xiwilxa yobtakil tzet yetal che yun yet c'ual xewilal, comon c'uxac'al che yutej. ¹⁸A ton juntzan ti' max yun eb jichmam, yuj tu' xan max yatek co Diosal masanil juntzan yailal ti' jiban, c'al yiban jun conob ti'. ¿Tom chi yochej e c'ul che tx'emc'altek yowal c'ul Dios jiban ayon Israel on ti', xan comon c'uxac'al che yut c'ual xewilal? quin chi bay eb.

¹⁹Yuj tu xin, xan max in chek makay puertail conob Jerusalén yet yaye'ualil yet toxa chi oc c'ual xewilal. Majc'al jak ayok masantac'al max eq'uel jun c'ual tu'. Max waon c'apax oc eb in chekbej taynen bay ti' puerta tu' yet watx' c'am junok yikatz eb chi txon tu', chi otek. ²⁰A eb txonjom tu' max can eb cayel oxe yet ak'balil yet c'ual xewilal bay yinlak conob Jerusalén tu'. ²¹Palta max in teyelej in ba yetok eb c'al in tenchanen eb yujtol chi ec' ak'bal yuj eb bay yinlak muralla tu'. Max walon bay eb, tatol ok e yunc'al axca tu', ok ex waoc yul preso, quin chi bay eb. Cay wal tu' max yun bekon eb jayoc yet c'ual xewilal. ²²Max lajwi tu' max walon bay eb levita tol chi watx'nej ba eb cax chi toj eb taynen bay puerta tu', yet watx' c'am chi etnelay el jun c'ual xewilal tu', xan max wal yin in txaj: Ach in Diosal, na in tek yin juntzan tzet yetal max wun ti', ok'okab a c'ul win atac'ala' a came'ulal, quin chi.

²³Ac'ala' yet juntzan c'ual tu' max wilon c'apaxok tol ay eb wet israelal tu' max yi eb eb ix ix aj Asdod, eb ix aj Amón, c'al eb ix aj Moab. ²⁴Ayxa nanok is yuninal eb chixa alon is ti' eb aj Asdod c'al is ti' juntzanxa nación. Axa pax is ti' eb jet israelal, c'am pax chi je' yuj eb. ²⁵A yuj tu' max in teyelej in ba yetok eb, c'al in catabnen eb. Ay eb max in mak'a' c'al in jatzon el xil jolom eb, max wak'on pural eb yak'on ti' bay Dios tol c'amxa chi yilej ba eb is c'ajol c'al is cutz'in eb yetok eb tx'ok conobal, tamwal yoc eb ix tx'ok conobal tu' yistzilok eb. Max walon c'apaxok: ²⁶Cay wal ti' max yun yoc is mul Salomón reyal Israel ti', caxc'al mi c'am junokxa rey lajan yetok bay juntzanxa nación, ay wal came'ulalil Dios yin, max alay oc co reyalok ayon Israel on ti', palta max ikbelay yin yobtakil yuj eb ix tx'ok conobal. ²⁷Yuj tu xin, ¿tom ok cha co c'ul e yaon oc e mul yelxac'al yob satak co Diosal, yin e yilen e ba yetok eb ix ix tx'ok conobal? quin chi bay eb.

²⁸Toltax a junok eb c'ajol Joiada, yitxiquin cham Eliasib sat sacerdote, niej yayji bay Sanbalat, a ton jun horonita. A jun niej tu' max wuktej el in satak, ²⁹xan max wal yin in txaj: ¡Ach in Diosal, iltek juntzan eb max etnentok jun opiso yin sacerdoteal c'al yin levitail! quin chi.

³⁰Caytu' max yun in watx'nen el tzet yetal max etaxtok yuj eb tx'ok conobal, cax max waon oc eb sacerdote c'al eb levita yin yopiso yin txolilal. ³¹Max walon tzet c'ual chi ilaytek te si'; max waloni tol yowalil chi yak' eb babel sat yawoj, xan max wal yin in txaj axca ti': ¡Ach in Diosal, na in tek, ok'okab a c'ul win! quin chi bay co Mam Dios.